

- लोकसभा मांय 130वाँ संविधान संशोधन बिल पेश करी ज्यो-इण ने संयुक्त संसदीय समिति ने भेजण रो प्रस्ताव।
- बीकानेर-दिल्ली बीच वंदे भारत रेलगाड़ी चलावण री मंजूरी।
- मुख्यमंत्री भजनलाल शर्मा दिल्ली मांय केन्द्रीय मंत्री मनोहर लाल खट्टर सागे मुलाकात कर र राज्य मांय बिजली अर मकानां ऊं जुड़्या मुद्दां माथे चर्चा कीनी।
- राज्य मांय केई ठोडां हल्की बारिश पाछे उमस अर गर्मी ऊं थोड़ी साता मिली।

000

गृहमंत्री अमित शाह आज लोकसभा मांय 130वाँ संविधान संशोधन बिल समेत तीन बिल पेश कीना। ई बिल मांय किण ई प्रधानमंत्री, मुख्यमंत्री अर मंत्री रे तीस दिन ताई हिरासत मांय रेहवण री सूरत मांय वां ने बर्खास्त करण रो प्रावधान करी ज्यो है। विपक्ष ई बिल री करड़ी खिलाफत करता थकां सदन मांय हंगामो कीनो। बिल रा प्रावधानां रे मुजब भ्रष्टाचार अर दूजा गंभीर मामलां मांय जेल मांय बंद प्रधानमंत्री, मुख्यमंत्री अर मंत्रियां ने 30 दिन पाछे ओहदा ऊं हटाया जा सकेला। हालांकि रिहा व्ह्यां पाछे वे ओजू ओहदा रो कामकाज संभाळ सकेला। संविधान संशोधन बिल रे अलावा पेश करी ज्यो दो दूजा बिल केन्द्र रा राज वाळा प्रदेशां अर जम्मू-कश्मीर मांय ऐड़ा प्रावधानां ऊं जुड़्या है। आं बिलां रो विपक्ष रा एआईएमआईएम रा असदुद्दीन औवैसी, कांग्रेस रा मनीष तिवारी, आरएसपी रा एनके प्रेमचंद्रन, सपा रा धर्मेन्द्र यादव अर कांग्रेस रा के.सी. वेणुगोपाल विरोध कीनो। वे इण ने देश रा संविधान रा बुनियादी ढांचा, मूलभूत सिद्धांत अर संसदीय लोकतंत्र रे खिलाफ बतायो। गृहमंत्री विपक्ष रा सदस्यां रा आरोपां रा जवाब मांय कह्यो के विधायिका मांय नैतिकता रा मूल्य बणाया राखण सारू ओ बिल लायी ज्यो है। सरकार इण ने संयुक्त संसदीय समिति ने भेजण रो प्रस्ताव कीनो है।

000

लोकसभा मांय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव आज ऑनलाइन गेमिंग प्रोत्साहन और विनियमन विधेयक -2025 पेश कीनो। ओ बिल रकम दे र ली जावण वाळी ऑनलाइन गेमिंग अर वां ऊं जुड़्या माली लेन-देन माथे रोक लगावण सारू लायी ज्यो है। बिल मांय ऑनलाइन गेमिंग ऑथॉरिटी री नियुक्ति रो ई प्रावधान करी ज्यो है। ऑनलाइन गेमिंग ऊं जुड़्या कानून री पालना नी करण री सूरत मांय तीन साल ताई री कैद अर एक करोड़ रुपया ताई रा जुर्माना या दोन्यू सजा रो प्रावधान करी ज्यो है। गर कोई, ई कानून रो ओजू उल्लंघन करेला तो तीन ऊं पांच साल ताई री कैद या अर दो करोड़ रुपया ताई रो जुर्मानो करण रो प्रावधान ई करी ज्यो है।

000

उप-राष्ट्रपति ओहदा सारू व्हेवण वाळा चुनाव मांय राष्ट्रीय जनतांत्रिक गठबंधन-एनडीए रा उम्मीदवार सी.पी. राधाकृष्णन आज पर्चा दाखिल कर दीनो। ई मौके प्रधानमंत्री नरेन्द्र मोदी, केई केन्द्रीय मंत्री अर गठबंधन रा नेता मौजूद रह्या। दूजी कानी विपक्ष रा इंडिया गठबंधन रा उम्मीदवार सुप्रीम कोर्ट रा पेली वाळा जज बी. सुदर्शन रेड्डी रो काल पर्चो दाखिल करण रो कार्यक्रम है। उपराष्ट्रपति ओहदा सारू नामपाना दाखिल करण री काल आखिरी तारीख है। 25 अगस्त ताई नाम पाछा लिया जा सकेला। पर्चा री जांच शुक्रवार ने करी जावेला अर 9 सितम्बर ने चुनाव सारू वोट पड़ेला।

000

राष्ट्रीय अनुसूचित जाति आयोग रा अध्यक्ष किशोर मकवाना समरसता बधावण अर अपराधां मांय कमी लावण सारु सामाजिक सहयोग माथे ज़ोर दीनो है। वे आज जयपुर रा शासन सचिवालय मांय राखी ज्यी मीटिंग मांय बोल रह्या हा। वे कह्यो के ई काम मांय साधु-संत अर संस्थावां असरदार काम कर सके है। ई दौरान आयोग रा सदस्य वड्डेपल्ली रामचंदर अर लवकुश कुमार ई मौजूद हा। दौरा रा दूजा दिन आयोग अनुसूचित जाति वर्ग अत्याचार निवारण नियम रा तैत कर्या जा रह्या कामां रो जायजो लीनो अर जरूरी हुकम दीना। मीटिंग मांय गृह राज्यमंत्री जवाहर सिंह बेढम आयोग रा सुझावां माथे अमल करण रो भरोसो दिरायो।

000

आयोग आज जयपुर कने जामडोली रा अनुसूचित जाति बालिका छात्रावास रो दौरा कीनो।

000

राजस्थान री चौथी वंदे भारत रेलगाड़ी बेगी ई बीकानेर-दिल्ली बीचे चलाई जावेला। रेलमंत्री अश्विनी वैष्णव इण री मंजूरी दे दीनी है। केन्द्रीय कानून मंत्री अर बीकानेर रा सांसद अर्जुनराम मेघवाल ई बाबत् रेलमंत्री ने लारला दिनां व्ही मुलाकात रे दौरान कागज सूप्यो हो।

000

मुख्यमंत्री भजनलाल शर्मा दिल्ली दौरा रा दूजा दिन आज केंद्रीय बिजली, आवासन अर शहरी कार्य मंत्री मनोहर लाल सागे मुलाकात कीनी। ई दौरान वे राज्य मांय बिजली अर रेहवास ऊं जुड़्या केई मुद्दां माथे चर्चा कीनी। मुख्यमंत्री केन्द्रीय मंत्री ऊं ग्रीन एनर्जी कॉरिडोर सारु बत्ती ऊं बत्ती मदद री अरज कीनी। वे जयपुर मैट्रो रेल रा दूजा दौरा काम ने बेगी मंजूरी देवण री अरज ई कीनी। केन्द्रीय मंत्री राजस्थान ने हर संभव मदद देवण रो भरोसो दिरायो।

000

नगरीय विकास, स्वायत्त शासन अर आवासन मंत्री झाबर सिंह खर्वा आज मंडल री पांच नुवी रेहवासी योजनावां री सरुआत कीनी। 667 नुवा मकानां वाळी आं योजनावां रा तैत बूंदी, बारां, बाड़मेर, धौलपुर अर उदयपुर जिलां मांय फ्लैट्स अर मकान बणाया जावेला।

000

पैली वाळा प्रधानमंत्री राजीव गांधी ने आज वां री जयंती रे मौके सिरधाभाव सागे याद कर्या जा रह्या है। राज्य मांय ई सद्भावना दिवस रा तौर ऊं मनायी ज्यी जयंती रे मौके न्यारी-न्यारी ठोडां खास कार्यक्रम राखी ज्या। पाली मांय राखी ज्या संगोष्ठी मांय राजीव गांधी रा सूचना क्रांति ऊं जुड़्या काम ने याद करी ज्यो।

000

मनरेगा रा तैत कराया जावण वाळा कामां मांय साफगोई लावण अर मजूरी रा चुकारा मांय गड़बड़ियां रोकण सारु युक्तधारा पोर्टल सरु करी ज्यो है। ई पोर्टल रे ज़रिए पंचायतां मांय मनरेगा अर विकास रा दूजा कामां री परख सारु तस्वीरां भेळी करी जावेला। डींग जिला री पांच पंचायत ने ई पायलट प्रोजेक्ट मांय चुणी ज्यी है।

000

झुंझुनूं मांय सड़क हादसां री रोकथाम अर यातायात नियमां रा बारा मांय जाग जगावण रा मकसद ऊं चलाया जा रह्या खास अभियान रा तैत आज हेलमेट बांटी ज्या। जिला कलेक्टर अरुण गर्ग महिला अधिकारिता विभाग री 200 ऊं बत्ती कर्मचारियां ने किफायती रेट माथे हेलमेट दीना। ई मौके श्री गर्ग जनता ऊं यातायात नियमां री पालना जरूर करण बाबत् कह्यो।

000

आकाशवाणी रा जयपुर केन्द्र मांय आज हिंदी कार्यशाला राखी ज्यी। ई मौके आला दर्जा रा लेखक अर साहित्यकार दुर्गाप्रसाद अग्रवाल राजभाषा हिंदी रा महत्त्व रा बारा मांय चर्चा कीनी। कार्यशाला मांय केन्द्राध्यक्ष लोकेश कुमार समेत केई अहलकार अर कर्मचारी हिस्सो लीनो।

000

राज्य रा केई हिस्सां मांय आज हल्की बारिश व्ही। सवाईमाधोपुर, करौली, जालौर, बाड़मेर अर आरे-सारे रा हलकां मांय दोपहरां पाछे व्ही बिरखा ऊं लोगां ने उमस अर गर्मी ऊं थोड़ी साता मिली। बांसवाड़ा जिला मांय दो दिन ऊं व्हे रही बिरखा ऊं माही बजाज सागर बंधा मांय लगातार पाणी आ रह्यो है। म्हाणा खबरनवीस बतायो के बत्तो पाणी निकाळबा सारू माही डेम 16 दरुजा खोल्या जा रह्या है।

000

मौसम महकमा रे मुजब लारला चौबीस घंटा मांय राज्य रा ऊगणी हलका मांय कठे-कठे चोखो मेह बरस्यो, जद के आतूणी हलका मांय हल्की बरसात व्ही। सब ऊं बत्तो 10 सेंटीमीटर पाणी बांसवाड़ा जिला रा लोहारिया मांय बरस्यो। दूजी कानी आतूणी हलका मांय पड़ रही ज़ोरदार गर्मी बीचे बाड़मेर मांय पारो 40 डिग्री सेल्सियस कने पूग ग्यो। जैसलमेर, जोधपुर, बीकानेर, चूरू, श्रीगंगानगर अर नागौर समेत केई ठोडां दिन री बगत पारो 36 डिग्री सेल्सियस ने पार कर ग्यो।

000

वर्ल्ड रैंकिंग पैरा आर्चरी होड़ मांय राजस्थान रा दो तीरंदाज भारत री पैरा तीरंदाजी टीम मांय शामिल करी ज्या है। आ होड़ चेक गणराज्य मांय 23 अगस्त ऊं राख्यी जावेला।

000